

Date – 30/10/2024

Time - 18:30 Hrs

1. Mizoram infiamna huang chhunga inelna hautakte zinga mi, thirsakawr intlansiak, Tour de Hmuifang 2024 chu vawiin khan hlawhtling taka hman a ni.
2. College thlan bik 4-te sawikhawm a cluster university hmanga Mizoram state university din tura ruahmanna siam a ni.
3. Hindu te kut pawimawh, Eng kutpui, Diwali chu ram chhung hmundang rualin Mizoramah pawh vawiin khan lawm a ni.
4. Sardar Vallabhai Patel-a pianchampha pualin National Unity Day hman a ni.

<><><>

#### TOUR DE HMUIFANG

Mizoram infiamna huang chhunga inelna hautakte zinga mi, kawng thui leh hahthlak tak zawha thirsakawr intlansiak, Tour de Hmuifang 2024 chu vawiin khan hlawhtling taka hman a ni.

Tourism Department, Mizoram Cycling Association (MiCA) leh NEC tangkawpin an buatsaih Tour de Hmuifang a tel te hi Tourism Minister Pi Lalrinpuii chuan zing dar 6:30-ah Vanapa Hall kawt atangin a vai liam a. A bul tanna inkhawm tawi buatsaihah Tourism Minister Pi Lalrinpuii chuan hian thu sawiin Tour de Hmuifang chu Mizoram Tourism hmasawna kawng pawimawh tak a nih thu a sawi a. Hei aia changtlung zawk a buatsaih tum zel a nih thu sawiin infiammi ten theihtawp chhuah a, Mizoram ti hming mawi tura tan la zel turin a fuih a ni.

Vawiin chawhnu herah khan intihsiakna hi hlawhtling taka zawh fel niin a hautak ber, Elite Category -ah K. Ronel Singh, Manipur in hnehna a chang a. Intihsiakah hian hming pe 48 awmin mipa 46 leh Hmeichhia 2 an ni a. State pawn atangin mi 13 an rawn tel bawk.

He intihsiaknaa Junior leh Master Category te hi Maubuang khawchhungah an tlan lut chho a, Thiak khawchhung tlang chhip lamah chho in kawngpui an rawn pawhthla leh a, Midum khamah chho in Hmuifangan thleng a an tlankawng thui zawng hi km 54 a ni. Open (Road) hi Hmuifang kawngdung pangngaiyah an tlan a, an tlankawng thui zawng hi km 50 a ni. Intihsiakna hautak ber leh pui ber Elite Category hi Muallungthu atangin Tuirial lamah liam thlain Khumtungah an chhuak chho a, Baktawng, Hmawngkawn, Chawilung, Lamchhip lamah kalin Hmuifangah an chhuak chho a, an ni tlankawng thui zawng hi km 82 a ni.

Mizoram Cycling Association General Secretary Pu Lalrinfela chuan hlawhtling taka Tour De Hmuifang hman zawh a ni chu lawmawm a tih thu heti hian Akashvani a hrilh a ni.

(byte)

<><><>

#### GAMES

Mizo hnam infiamna a inelna (Mizoram Indigenous Games) chu vawiin atang khan Lawngtlai District-ah tan a ni.

Mizoram Indigenous Games hi Doordarshan Aizawl bultumin, Mizoram Indigenous Games Association leh Central Young Lai Association te nen tangkawpa huaihawt a ni a. Mini Sports Complex, Electric Veng Lawngtlai ah Lawngtlai BDO, Pu Collin Hlychho chuan a hawng a. Pu Collin Hlychho chuan mahni tualchhuak Infiamna chawinun kawnga hmalakna chak taka kalpui a ni chu lawmawm a tih thu a sawi a, mahni hnam ziarang leh infiamna te ngaihhlut a tul a. Hnam infiamna ten hriat a hlawh loh chhoh mek karah a chawinun na'n a nasa zawka hmalak tul a tih thu sawiin, Mizoram in pi leh pute hun atanga infiamna a neihte chu tunlai hunah pawh infiamna nuam leh hautak lo tak tak a ni a, uar deuh deuh theih nise a duh thu a sawi.

Mizoram Indigenous Games hawna hi MIG & PEX DDK Producer Pu T. Siama'n a kaihruai a, Central YLA sports committee chairman Pu C. Lalhmachhuana'n inlawmna thu a sawi a, hawna-ah hian mimal leh huho zai te ngaihthlak niin, infiamna hmanga intihsiak zui nghal a ni.

Intihsiakna-ah hian inbuan, insuknawr, in-arpa-thai, inkawibah, insaihrui pawh bakah lai paih ah te an inel a. Zanin hian Chandmary Inpui ah chhunzawm a ni anga, ruahman lawk dan chuan naktukah zawhfel tum a ni.

<><><>

#### CMRF

Vawiin khan Mizoram PWD Class-I Contractor Association in Chief Minister Relief Fund (CMRF) atan Cheng nuai sawmpanga Chief Minister Pu Lalduhoma an hlan. Chief Minister hian lawmthu lo hrilhin, CM RF hi an dawng tha thawkhat niin a sawi a. Tanpui ngaite hnenah an sem chhuak nasa bawk a, nitina pe chhuak ang an ni a, a tangkai em em a ni, a ti.

<><><>

#### STATE UNIVERSITY

College thlan bik 4-te sawikhawm a cluster university hmangin Mizoram state university din tura ruahmanna siam a ni.

Higher & Technical Education Minister Dr Vanlalhlana kaihhraina hnuai ah nimin khan Mizoram state university din dan tur chungchangah inrawnkhawmna huaihawt a ni a. A bul atanga State University thar hlak din a hautak dawn avangin, state college thlan bik pali (4) chu sawikhawmin cluster university a Mizoram State University hi din tura ruahman a ni. He inrawnkhawmna-ah hian Higher & Technical Education department official-te, Mizoram College Teachers' Association aiawh leh state sawrkar hnuai ah college thlan bikte atangin principal leh zirtirtute an tel a. Mizoram state university dinna tur dan duan lawk (draft bill) sawi ho tula hriat lai te sawi hovin zawhna leh chhanna hun hman a ni a, sawi fiah ngaite sawi fiah niin sawi hona hun hman a ni. Mizoram State University Bill duan chhin hi assembly-a a putluh theih turin Cabinet thutkhawmna a thlir ho tura chhawp chhuah ni ang. Dan duan chhinah chuan Mizoram State University chu postgraduate programme zirna tura ruahman a nih bakah, multidisciplinary leh research-oriented institute ni tura duan a ni a. Hemi tur hian ram luah turte pawh en thlithlai tan niin state-in resource a neih sa zir chian mek a ni.

Tun dinhmunah he hmalakna, Mizoram State University din tura ruahmanna atan hian bill drafting committee leh study team din tawh niin study team hian Cluster University of Srinagar leh Cluster University of Jammu kal dan zir chiangin bill drafting committee thlir ho turin an theh lut tawh a. Dan duan chhin hi finance department leh law & judicial department nen pawh higher & technical education minister kaihhraina hnuai ah enho tawh a ni bawk. National Education Policy 2020 chuan state university la nei lote chu kum 15 chhunga din turin a beisei a. Tun dinhmuna Mizoram a hrana state university a neih loh avang leh, a awm sa Mizoram University leh ICFAI te chu central university leh private university a nih avangin NEP 2020 duh danin Mizoram sawrkar chuan ke a pen chhoh a ngai a. Mizoram State University hi din a nih chuan tuna state sawrkar hnuai ah college-te chu State University hian a enkawl tawh dawn a ni.

<><><>

#### DIWALI

Hindu te kut pawimawh, Eng kutpui, Diwali hman mek chu ram chhung hmundang rualin Mizoramah pawh vawiin khan lawm a ni.

Thatna-in sualna a hneh chhinchhiahna kutpui Diwali-ah hian chenna in, temple leh vantlang hmunah te eng chi hrang hrang chhit a ni. Mizoram chhunga Assam Rifles te chuan a hranin he ni pual hian programme lian tham an buatsaih lo a, an chenna inah theuh eng chhi-in he kut hi an hmang tih Akashvani an hrilh. Gorkhali te pawh Diwali-ah hian kumdanga an tih thin angin carol in hun an hmang a, in tinah kalin he ni pual hian ni 4 chhung programme an siam a ni.

Kolasib-ah pawh vawiin khan Hindu sakhaw zuitu hnam hrang hrangte chuan Shiv Mandir, Kolasib Hmarveng-ah Diwali an hmang a. Shiv Mandir a kal te chu puithiam Pandit Rajib Upadhyay chuan malsawmna a hlan. Diwali Puja den chhen hian zanin atangin Mizoram Gorkha Youth Association (MGYA) leh Nuho Pawl (Nari Samaj), Kolasib Branch te chu Gorkha te chenna in hrang hrangah an carol dawn a. Kolasib Shiv Mandir Committee President Pu Manu Prasad Subedi chuan, Diwali Puja hlim taka an hman thu Akashvani hrilhin Hindu sakhaw zuitu hnam hrang hrangte leh sakhaw hrang hrang zuitute chu Diwali Puja chibai a buk tih a sawi a ni.

<><><>

## **BAPTIST WOMEN**

Aizawl Area Baptist Kohhran Hmeichhe Pawl te chuan vawiin khan Central Church BCM Biak In, Aizawlah intawhkhawm, Joint Fellowship hun an hmang.

He intawhkhawmah hian chawhma lamah Area Development Committee Chairman Rev. C. Lalhnglianah thuchah a sawi a. Chawhnu lamah BCM kalphung an zirho a, Area Development Committee Vice Chairman Upa Dr Lallianzuala Hnamte in a zirtir a ni. He intawhkhawmah hian thupui atan, ‘Tho la, i Pathian ko rawh’ tih an hmang a ni.

<><><>

## **AIR News on Social Media**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theih a dah a ni.

<><><>

## **NATIONAL UNITY DAY**

Vawiin hi hnam inpumkhatna ni, National Unity Day a ni a, he ni hi ram zalenna sualtu pawimawh, Dy Prime Minister leh Home Minister hmasa ber ni bawh, Sardar Vallabhai Patel-a pianchampha hriatreng nan, kumtin hman thin a ni.

He ni pual hian Prime Minister Narendra Modi-a hovin mipawimawh-ten Gujarat, Ekta Nagar-a Statue of Unity-ah hriatrengna pangpar an dah a, New Delhi-a parliament building hlui, Samvidhan Sadan-a Sardar Patel-a lim-ah Union Home Minister Amit Shah, MP-te leh mipawimawh dang-ten pangpar an dah bawh.

Vawiin hi Prime Minister hlui Indira Gandhi thih champha a ni bawh a, Cong hruaitu Rahul Gandhi, Cong President Mallikarjun Kharge leh hruaitu dang-ten Shakti Sthal-ah hriatrengna pangpar an dah a ni.

<><><>